

Namminersorlutik Oqartussat sanaartornermut aningaasaliuttagaasa kommuninut ingerlatassanngorlugit tunniunneqannginnerini sanaartornermut inatsisit ataatsimoortut naammassineqarsimanissaat atuutsinneqalersimanissaallu siunertaralugu sanaartornermut inatsisissatut siunnersuummik ataatsimoortumik saqqummiussinissaq siunertaralugu Naalakkersuisut sulissuteqaqqullugit Inatsisartut aalajangiiffigisassaattut siunnersuut

(ATASSUTIP Inatsisartuni ilaasortaataitai: Finn Karlsen, Siverth K. Heilmann, Knud Kristiansen)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Aappassaanneerreqarnera

Naalakkersuisut Ineqarnermut Attaveqarnermullu Ataatsimiititaliaq piumassuseqarluni siunnersuummik suliaqarnera pillugu qutsavigissavara.

Ataatsimiititaliap isumaqatigiissup siunnersuutip itigartinneqarnissaa Inatsisartunut inassutigigaa Naalakkersuisut maluginiarpaat. Taamaattorli ataatsimiititaliap oqaatigaa, Naalakkersuisut 2007-imi aqqqissuusseqqinnermi killiffiit pillugit nalunaarummik saqqummiussineranni allassimasoq Naalakkersuisut 2008-mi upernaakkut ataatsimiinnermi inatsisissatut siunnersuutininik marlunnik, tassalu kommunini qinersisarneq pillugu inatsisissamik aamma suliassanik akisussaaffinnillu nuussinissamut maleruagassiornermi ingerlatseriaatsimut inatsisissamik saqqummiussiniartut.

Tamatumunnga atatillugu Naalakkersuisut oqaatigissavaat, 2009-mi kommunit kattunneranni ikaarsaarnermut ataatsimiititaliangortussanut / kommunalbestyrelsinngortussanut qinersinissamut atatillugu qinersisarnermut inatsimmi maleruagassiornissamut isumaliutaasimagaluit, kommunini suliassaqaqfinnik aqqqissuusseqqinneq pillugu Inatsisartut inatsisaanni nr. 14-imi, 19. november 2007-imeersumi aalajangersarneqarmata. Taamaattorli Naalakkersuisut oqaatigissavaat, apeqqutit assigiinngitsut, soorlu aatsitassarsiornermut aammalu aluminiuliorfiliortoqassappat tamatumunnga atatillugu sulisussanik nunanit allaniit tikisitsisarnermut tunngasut tunngavigalugit qinersisarnermut inatsimmi aalajangersakkat maannakkut atuuttut nalilersorneqarnissaat pisariaqartinneqartoq Naalakkersuisut isumaqarmata. Qinersisarnermut inatsisip allanngortinneqarnissaa pisariaqartoq paasinarsissappat, kingusinnerpaamik 2012-imi Naalakkersuisut tamanna pillugu siunnersuummik saqqummiussissapput.

Ingerlatseriaatsimut inatsit, suliassanik nuussinerit qanoq ingerlanneqarnissaannut maleruagassiorfiusussaq eqqarsaatigalugu, taamanikkut Naalakkersuisuusut ingerlatseriaatsimut inatsisissarpiaamik saqqummiussinissamut tunngavissaqarsorisimanngilaat. Tamatumunnga taarsiullugu suliassanik nussuinerit illuatungeriit akunnerminni isumaqatigiinnerat tunngavigalugu ingerlanneqarpata eqaannerusumik nussuisoqarsinnaassasoq taamanikkut naliliisoqarpoq. Suliassanik

nuussinissanut ingerlatseriaatsimut inatsimmik saqqummiussinissaq Naalakkersuisut siunnerfiginngilaat.

Ataatsimiititaliap isummersuutai Naalakkersuisut tamakkiisumik taperserpaat, aammalu siunnersuutip itigartinneqarnissaa pillugu ataatsimiititaliap inassuteqarnera isumaqatigalugu.